



眞繫

ル 5
3254
11



凡 5
3254
11

滇繫書目

趙州師 範荔屏纂輯

典故第三冊

馮甦滇考

王鴻緒明史稿

無名氏求野錄

趙翼平定三逆述略

無名氏也是錄

李遜之三朝野紀

滇繫 七之三

典故目錄

昭和十一年
六月二十日

治要

李昉冊府元龜

鄧子龍約束土司檄

魏裔介傳諭滇黔檄

滇繫

典故繫

趙州師 範蒞扉纂輯

滇攷

普明聲阿迷州土人也初為馬者哨哨頭水烏之亂與沙源吾必奎等俱奉調率兵破賊有功既而京營御史傅宗龍受命按黔間道由建昌回滇募兵赴任知明聲勇黠所部土兵亦強特請隨行滇撫閔洪學入奏嘗言自明聲東行滇土司兵益弱其為時所重如此明聲在黔屢破水西賊眾會宗龍以內艱歸水西隨就撫明聲亦回得授阿迷土知州日益驕蹇崇禎五年巡

滇繫

七之三

典故

一

沙裏
按趙洪範至臨安明聲率兵逐之戈甲旗幟列數里洪範惡之
貽書撫軍王伉謂其養癰伉亦習聞明聲不法遂列奏請檄調
黔蜀兵會討焉是年冬三省漢土兵俱集以黔鎮商士傑掌兵
政伉自出臨安督糧右布政使周士昌監軍擊明聲敗之進圍
阿迷明聲使其下偽約降陰使人以重賄誘吾必奎曰君不聞
狐死兔悲乎阿迷平兵行及元謀矣旣而官軍與賊戰必奎賣
陣先走官軍大敗事聞大司馬熊明遇以起釁爲伉罪遂與洪
範俱被逮士昌歿於陣明聲雖戰勝仍巧詞乞撫當道懲前事
不復致討總督朱燦元自黔至以兵威撫定焉廣西郡守張繼

孟奉委撫明聲思以計殺之每稱明聲才武且有功不宜摧毀
以致變亂皆有司之過也明聲聞之喜一日繼孟將謁兵備道
於臨安先誠其下必取途阿迷見明聲將至故熟睡輿中其下
不得請醒而問所次已踰其境數里矣佯怒責其從行者且曰
我有事須急至臨郡往返恐後期可沿途置騎俟我我今回見
普公遂盡屏輿蓋先行獨與從者馳數騎趨阿迷明聲先已有
人偵繼孟聞其言益大喜出通謁語甚歡方持茶餉客繼孟戲
曰嘗聞南中土司善藥人我不敢飲明聲驚遽指天誓曰方德
公無以報何有此公果疑明聲請先飲竟易盞飲之不知繼孟

執茶時已預藏毒藥手中置茶內矣明聲留治饌辭以有事謁
兵備急俟回當痛飲明聲已聞其途中言信以爲實因別去繼
孟疾馳易數馬卽夕達臨安明聲藥發始覺命其黨率兵追之
不能及明聲死其妻萬氏江石寄籍人女也狡而淫據其衆役
使諸小彝選部下壯而美者更番入侍沙源諸子定海定洲如
琦等皆與之私旣久覺無以服人乃招定海爲贅壻已復嫌其
樸陋而定洲少年白晢更竊殺定海而贅定洲其子普服遠耻
之與萬氏分寨而居後服遠以病死定洲遂兼有安南阿迷之
衆併近彝地愈廣南至交岡甲申張獻忠陷蜀雲南震恐使參

將大贊率兵防金沙江吾必奎者其先爲元謀土知縣久絕不
嗣矣至必奎以戰功得官仍居故地自阿迷賣陣後傑驚曰甚
大贊貪墨屢以事侵之乙酉八月必奎聚衆反連陷武定祿豐
楚雄諸郡縣黔國公沐天波檄各土司兵會剿十月官軍與土
官祿永命龍在田等擊敗必奎擒之永命甯州土知州在田石
屏州土人也俱以水烏之亂有戰功在田歷級副將崇禎十一
年奉調至襄陽隸總理熊文燦軍前擊流賊革里眼射場于
雙溝敗之以是知名張獻忠等受撫穀城頗與密旣而獻忠叛
文燦獲罪在田亦罷歸元謀之役與永命俱在行間十一月沙

定洲兵亦至時必奎已伏誅定洲猶留城外不肯歸會好人饒希之余錫朋等通騙天波金寶無以償以貿易往來各土司營中誇天波家饒富定洲心動陰結都司阮韻嘉張國用袁士宏等爲內應以十二月朔入城辭行天波以家忌未出見定洲入門大呼其下蜂起焚劫天波由小竇出西城時祿永命在省方巷戰拒賊從官周鼎止天波留討賊天波疑鼎見誘殺之遂走楚雄其母陳氏妻焦氏亦走城北普吉村之金井菴當夜舉火自焚死定洲因盡得沐氏所有盤踞省城劫巡撫吳兆元爲題請代天波鎮滇又至祿豐執家居大學士王錫袞置貢院脇之

與兆元傳檄各郡縣龍在田在安甯與祿永命等各引所部歸萬氏在阿迷聞變驚曰吾家當爲此賊敗矣謀至省執定洲以投誠旣至見定洲氣酸赫然資用饒洽更喜過望夫婦坐八人輿持刺與撫按往來欣然自得也沐天波至楚雄定洲率衆追之是時楚雄新爲吾必奎所破金滄道副使楊畏知奉調監軍至楚楚人留之畏知遂駐楚聞定洲西出與天波計守禦之具未集曰公在楚賊以全力聚攻城必破公不如西走永昌使楚得爲備賊卽西追恐楚塞其後留攻楚又恐公從西來首尾牽制上策也天波從之定洲至楚雄城閉不得入爲畏知所給遂

去遣其黨王朔李日芳等分攻大理蒙化陷之屠殺以萬計畏
知乘間撤城外居民盡入城清四野築隍陣檄調漢土兵馬郡
縣多遙應之其明年丙戌定洲恐畏知截其歸路又聞迤東祿
永命龍在田等各自守因不敢至永昌撤兵回竭力攻楚雄楚
雄守具既集屢攻不能下一日畏知坐城樓賊發巨礮擊之烟
燄所指正罩畏知賊相慶謂必死須臾烟散畏知端坐如故惟
擊去左幘耳因驚歎以爲神畏知視賊懈輒出奇兵奮擊前後
所殺甚夥至夏賊稍稍引去東攻石屏石屏守亦堅復回攻甯
州破之永命死至嶧峨土官王克猷走死於路龍在固在石屏

懼與其黨許明臣竄大理定洲既定迤東復引而西攻楚雄分
兵爲七十二營每七營各爲一大營屯之環城空濠爲久困計
畏知守益堅終不能入又明年丁亥張獻忠被誅於西充其義
男孫可望等率殘兵由遵義入黔龍在田使人告變且勸其至
滇可望因詐稱黔國焦夫人弟率兵來復仇雲南初苦沙亂皆
延頸望其來不知爲賊也三月可望等至滇定洲解楚雄之圍
率衆禦於革泥關大敗遁歸阿迷可望破曲靖及交水俱屠之
遂由陸涼宜良入省宜良知縣方興佐率衆持羊酒迎可望賊
喜不入城至省巡撫吳兆元等遁於郊巡按羅國獻在曲靖被

滇東
王
執不從帶至省自焚於署前通判朱壽琳以僉都御史奉差募
兵於滇亦不屈從容賦絕命詩被殺可望等因盡據城池官署
布列以居法禁苛切百姓失業流離視昔較甚矣既而分遣李
定國狗逸東諸郡可望自率兵西出楊畏知禦於啟明橋兵敗
被執可望聞其名不殺誘降之曰吾今已不爲賊當與爾共扶
明耳畏知曰果爾當從吾三事一不用獻僞號二不殺百姓三
不擄婦女可望皆許之卽折箭對誓迤西得免屠戮畏知之力
也可望至大理龍在田許名臣迎降之復以書諭沐天波如與
畏知言天波遣子報命永昌通判劉廷標上杭人推官王運開

夾江人俱不屈自縊死可望分兵入麗江悉取其數代所畜厚
待天波子陰使劉文秀隨之疾馳度蘭津橋至永昌會天波與
鄉官龔彝等於北城樓遂携之同楊畏知等俱至省姚安舉人
席上珍拒賊見執至省被磔甚慘李定國至臨安臨安爲定洲
部目李阿楚駐守拒戰甚力定國穴地道置砲砲發而城陷阿
楚赴火死兵猶巷戰定國怒執城中紳衿兵民盡戮之於城外
白塲所殺七萬八千餘人而陣亡與自焚自縊者不與焉初意
遂襲阿迷蒙自取定洲聞晉甯有變因盡掠臨安子女而回過
河西在籍巡撫都御史耿廷錄赴水死其妻楊氏被執亦不屈

見殺至晉甯圍之屠其城并屠昆陽呈貢歸化所殺又數十萬人先是昆陽有孔師程者以從軍得官糾合晉甯各城人拒賊定國既至師程入舟遁去晉甯知州石阡冷陽春呈貢知縣嘉興夏祖訓俱死之定國又盡殺臨安被獲婦女於路亦千餘人江川知縣周柔強不迎定國率眾屯於撫仙湖中之孤山定國既至省使人出擊盡殲之蓋迤東屠戮之慘幾與蜀省同而迤西獨免宜楚雄人至今尸祝楊畏知不衰也然城亾與亾大節不奪如冷陽春諸人亦何可多得哉可望定國既俱回省經營土木毀南城民居萬間作演武塲城內置四王府磚石毀呈貢

昆陽一城爲之可望文秀定國與艾能奇皆僭稱王在籍御史任俱等又倡議尊可望爲國主可望遂置六部等官以僕兼吏禮二部尚書鑄興朝通寶錢括近省田地及鹽井之利俱以官四民六分收取各郡縣工技悉歸營伍以備軍資可望饒機智既據有全滇益自尊大而其黨猶僭視之李定國尤崛強每事相阻忤明年戊子可望與劉文秀等議縛定國於演武塲磔其罪杖之百既復相與抱持而哭命定國取沙定洲以贖罪定國心憾之念相推奉已久無能與抗也初定洲歸屯兵俱革童與萬氏分險自守其下湯嘉賓陳長命等各據一山立營相去數

十里爲犄角之勢私通交趾借其援以固諸蠻心一日偶集於嘉賓營定國偵得之率兵遽至圍以木城困守三閱月絕其水源諸蠻懼出降者相續遂械定洲等數百人回省剝其皮於是沐天波具衣冠謝其祖宗母弟妻子之讐滇人之被沙毒者亦咸以爲快焉

師範曰萬氏以一夷婦斃明聲殺定海卒陷定洲以喪元殄嗣雖剥皮刳腸而滇之殘燬已不堪問使從彼初念執定洲以投誠矯矯然足蓋前愆矣乃既懾其氣勢復斃其饒裕易曰見金夫不有躬其此之謂歎

明史稿

永明王由榔明神宗孫桂恭王常瀛少子也天啟七年恭王就封衡州崇禎十六年張獻忠陷衡州王由永州入粵西寄食蒼梧明年春二月莊烈帝殉社稷是爲我

大清順治元年擊敗闖賊中原底定二年夏

王師南下福王被擒江南平廣東在籍尚書陳子壯將奉恭王監國會唐王聿鍵自立於閩議遂寢是年王薨於蒼梧二子長安仁王由棖亦病卒三年秋八月

王師下汀州執唐王聿鍵粵中總督丁魁楚巡撫瞿式耜巡按

王化澄與舊臣呂大器李永茂晏日曙湯來賀董天閔朱治澗周鼎瀚方以智朱容藩林佳鼎程源等議所立乃共推永明王桂太妃王氏曰諸君何患於無君吾見仁柔非撥亂才願更擇可者魁楚等請益堅遂以冬十月十四日稱監國於肇慶以魁楚爲大學士兼戎政尚書大器爲大學士兼兵部尚書式耜爲大學士兼吏部右侍郎永茂請終制化澄以下進爵有差未幾贛州報至初唐王舊輔蘇觀生粵人也以擁護功授大學士由粵募師援贛駐南雄不敢進是月

大清兵破贛州觀生奔回廣州至三水魁楚素與觀生不協又聞贛州信乃與司禮太監王坤倉卒奉王奔梧州式耜等力爭不得已而觀生使陳邦彥來勸進復回肇慶十一月唐王第聿鏐浮海至廣州觀生與布政使顧元鏡總兵林察等擁入廣州城自立僞號紹武招海上鄭石馬徐四姓盜授總兵等官與肇慶相距是月永明王亦自立於肇慶僞號永曆使給事中彭耀赴廣州諭觀生被殺乃以兵部右侍郎林佳鼎督兵赴三水佳鼎故粵中監司與林察同姓相善察使羣盜詐降佳鼎信之乘勝追至三山口亂作全師皆覆佳鼎同僉事夏四敷赴水死肇慶大震以化澄代佳鼎督師大器辭官入蜀遂以化澄爲尚書

起李永茂爲大學士未幾亦罷十二月

大清兵由福建趨潮州惠州俱下之潛師襲廣州執聿鏘觀生自縊祭酒梁朝鍾太僕寺卿霍子衡等死之餘皆降聿鏘與周益遼等二十四王俱被殺報至肇慶式耜請駐峽口太監王坤不從以朱治憫爲兩廣總督守肇慶奉王走梧州四年春正月大清兵向肇慶治憫走王由梧州走平樂魁楚走岑溪化澄走

潯州

大清兵入肇慶遣別將徇高雷廉三府再取梧州二月王走桂林以吳炳方以智爲大學士同式耜入閣辦事以智不至遣使

湖南慰勞何騰蛟趣其兵入衛徵四川文安之雲南王錫衮入閣以周堪賡郭都賢劉遠生等爲六卿丁時魁金堡等爲給事是時孫可望等方由川貴入雲南錫衮以道阻不能達安之亦不至魁楚棄王走岑溪

大清兵至薙髮迎降全家被戮旣而平樂亦不守王大恐會武岡鎮將劉承胤以兵至全州王坤請赴之式耜諫不聽式耜請保桂林與城存亡乃以式耜兼吏兵兩部尚書督師留守以麾下焦璉爲總兵封陳邦傳爲思恩侯守昭平王自桂林走全州三月封承胤安國公錦衣指揮馬吉翔郭承昊嚴雲從等爲伯

眞繫

七之三

典故

御史毛壽登爭之吉翔怒激承胤脅王杖壽登及劉湘客吳德藻萬大吉於牙門外承胤又力爲申救得免皆奪職以五千人援桂林挾王歸武岡州改曰奉天府政事皆決於承胤矣而承胤前所遣援桂兵在城與璉兵王客不和於五月中擊傷璉大掠城中而去式耜檄誅首惡二十餘人劾承胤馭兵無狀璉兵亦出城赴黃沙鎮

大清兵復攻桂林璉聞從人長潭回桂林與

大清兵還戰桂林城下衆遂退屯陽朔會陳邦彥以甘竹灘余龍兵犯廣州

大清兵東向又張家玉陳子壯等破東莞高明等縣

大清兵往來追擊桂林稍定封式耜臨桂伯璉新興伯王在奉天召戶部右侍郎嚴起恒爲大學士同吳炳入閣辦事是時

大清兵下湖南何騰蛟退保衡州張先璧走寶慶堵胤錫走永定衛忠貞營李赤心等犯荊州不克潰入歸巫馬進忠等遁五溪山中先是承胤在湖南受騰蛟節制騰蛟以藤溪之捷請加郝永忠援勦左將軍張先璧援勦右將軍承胤怒至是以長沙不守奏解騰蛟兵柄召之入朝先璧奏劾承胤專擅騰蛟反和解之及聞先璧提兵至寶慶懼又請命騰蛟督諸鎮兵守衡州

夏五月

大清兵至衡州永忠遁走騰蛟退保永州湖南巡撫章曠卒於永安秋八月

大清兵由寶慶直趨奉天城外吉翔等挾王走象州大學士吳炳被執死焉劉承胤舉城降參將謝復榮戰死王由靖奔柳州道出古泥總兵侯性司禮監太監龐天壽率舟師迎王宮眷內暨會天雨狼籍泥淖中饑餓無人色性供帳儲峙皆備王喜封性商邱伯以天壽代王坤掌司禮監印九月王在柳州式耜請回桂林會土司覃鳴珂與守道龍文明相仇殺文明走鳴珂大掠城中矢及王舟王南走象時

大清兵已定湖南下永州郝永忠盧鼎等俱還桂林已而騰蛟起恒湘客亦至與式耜議分地給諸將使各自爲守式耜與璉已先復陽朔及平樂陳邦傳由賓州復潯州合兵復梧州廣西全省稍定冬十二月王回桂林式耜起恒與化澄竝相騰蛟督師出全州王坤龐天壽掌司禮監事五年春正月叙全州功晉騰蛟定興侯柱國太師兵部尚書越印選新甯伯胡一青興甯伯焦璉新興侯二月

大清兵至靈州郝永忠潰於興安奔還桂林挾王走柳州縱兵

大掠滇營兵亦入城縱火相攻朝士皆被戮尋騰蛟聞警馳回
璉一青等各率所部至是月二十二日

大清兵攻桂林式耜城守騰蛟等拒戰時南昌金聲桓叛於

大清尋李成棟佟養甲亦叛秋八月王至肇慶封成棟將軍以
其子元胤爲錦衣指揮使冬十月

大清兵抵南昌成棟退奔南康十一月王使盜殺養甲於梧州
六年春

大清兵圍南昌又南下湘潭金聲桓死馬進忠等敗走督師何
騰蛟被執死於長沙王聞震悼贈中湘王諡忠烈二月李成棟

兵敗於信豐渡河墮水死三月

大清兵取衡永堵胤錫走尋卒於潯州夏四月孫可望疏至肇
慶請封陳邦傅中軍胡執恭矯敕印封可望秦王而肇慶不知
也及實封至不受是冬封皮熊匡國公王祥忠國公守滇黔十
二月

大清兵下廣東七年王自肇慶走梧州高必正與陳邦傅相讐
殺秋九月孫可望由雲南東襲貴州皮熊走清浪追執之奪其
兵又攻遵義王祥自刎死張先璧馬進忠皆歸於可望勢益強
冬十二月

大清兵取廣州范承恩降杜永和奔瓊州

大清兵入桂林留守瞿式耜總督張同敞死之王自梧州奔南甯陳邦傅在清遠飛帆先歸邀劫從官於藤江殺部郎潘駿觀童英許王鳳等八年春三月孫可望遣兵護衛因殺阻秦封嚴起恒楊鼎和劉堯珍吳霖張載述等投起恒屍於水秋九月陳邦傅降於我

大清九年春二月王走安隆改曰安龍府可望歲以銀八千兩米百石上供從官取給焉十年王在安隆日益窮促聞李定國與可望有隙使內監張福祿全爲國諭定國以兵來迎馬吉翔私告可望十一年春三月可望使鄭國王愛至安隆磔福祿爲國與張鐫殺蔣乾昌等十四人以吳貞毓大臣勒自盡十二年可望遣兵犯常德敗歸王在安隆塗葦薄以自蔽日食脫粟守將文吏承可望意無人臣禮十三年李定國敗於新會將由安隆走滇可望偵知之促王移黔王故遲行定國至遂奉王由安南衛走雲南居可望署中封李定國爲晉王劉文秀爲蜀王可望以妻子在滇未敢公爲逆也十四年王送可望妻子還黔遂舉兵反然人心多不直可望部下諸將皆願歸定國與定國相拒三分白文選輕騎奔定國軍兵旣交部將馬惟興先走遂大

敗可望逃回貴州定國慮會城有失使別將追之自引兵還可望至貴州部將馮雙龍紿之言追兵至可望知人心已散遂挈妻子赴長沙

大軍前降十五年春三月

大清兵三路入雲南夏四月劉文秀卒

大清兵由蜀入者自三陂取遵義由楚入者自鎮遠抵黔由粵入者抵獨山州冬十月三路兵俱集信郡王奉

命自北至會於楊老堡戒期入滇李定國扼雞公背圖侵貴州遣別將守七星關抵孫界立營窺遵義以牽蜀師十二月

大清兵出遵義由水西取烏撒守將棄七星關走霑益

大清兵入安隆李定國連敗於安隆之羅炎涼水井撒寨遁歸王聞變先走永昌十六年春正月三日

大清兵入雲南王走騰越李定國敗於潞江王夜走南甸二十六日抵囊宋河是爲緬境緬勒從官盡棄所攜兵器始啟關至蠻漠土司二月緬以四舟來迎王從官自覓江舟隨行者六百四十餘人陸行者自故岷王子而下九百餘人期會於緬甸十八日王至井亘初李定國旣敗於潞江走孟良白文選走木邦已而文選以兵攻緬不勝走回孟良夏四月羣臣沐天波等謀奉

王走戶臘二河不聽五月四日緬復以舟迎王五日發井亘七日
至阿瓦阿瓦者緬酋所居城也八日至赭硜始知陸行者盡
被緬人掠爲奴多自殺惟岷王子八十人流入暹羅緬人於赭
硜置草屋居王遣兵防之十七年定國文選會兵攻緬索王不
得敗緬兵於瑞羊堡十八年定國再與緬戰於垵拍文選助之
敗緬兵緬終不肯出王從官資用盡竭夏五月會緬酋弟莽猛
白代立給百官渡河盟旣至以兵圍之殺武臣沐天波馬吉翔
王維恭魏豹馬雄飛王啟隆蒲纓王自京龔勳陳謙吳承爵安
朝柱任子信張拱極劉相宋宗宰劉廣銀宋國柱丁調鼎文臣
鄧士廉楊在鄔昌琦鄧居詔任國璽裴廷謨楊生芳潘璜齊應
翼郭璘張宗伯內監李國泰李茂芳楊宗華楊強益李崇貴沈
猶龍周某盧某曹某等凡四十有一人惟存永明王與宮眷二
十五人秋八月定國再以舟師攻緬索王復爲所敗定國與文
選皆引還冬十二月
大清兵臨緬白文選自木邦降緬人以永明王父子送
軍前明年夏四月二十五日死於雲南六月李定國卒於猛臘
其子李嗣興與劉文秀子劉震俱降是爲

聖祖仁皇帝康熙元年也

真繁 七之三

典故

七

師範曰甲申後有所謂三藩者福王名由崧甲申至江甯爲
馬士英等所立僞號宏光乙酉五月大軍破浦口奔蕪湖
被獲于坂子磯唐王名聿鍵乙酉以福州爲福京僞號隆武
丙戌十月大軍入仙霞嶺欲奔贛州至汀州執歸福州死
之一卽由榔然其時如靖江王嘉亨魯王以海唐王之弟聿
錡皆紛紛爭貴不知陽精麗天螢火自當歛耀惟借忠臣
義士之碧血丹心了此一化殘局天道所關亘古如斯也聞
三桂既縊由榔逆其妃女入京奉旨給屋養膳並撥宮女
二人支應寬仁之政實邁往代云

求野錄

順治^{十年}五年^{戊戌}正月永明王以原督師兵部尚書程源爲禮部尚

書都御史錢邦芑掌院事並賜吳毓貞范鑛等贈卹

鑛總督雲貴駐扎黔省時孫可望兩使李定國一使白文選
將兵赴黔與鑛盟共申倡義扶明之約鑛因從容爲定國文
選開陳大義且曰萬一可望渝盟奈何定國曰可望扶明我
則奉之若其渝盟我則殺之無難也迨後王入安龍可望強
橫自恣無人臣禮文選燕見鑛有慚色邦芑巡撫四川時文
選與忠國公王祥盟于烏江邦芑爲執牛耳後可望襲遵義

王祥走死文選晤邦芑亦汗愧不能仰視邦芑曰非公賣國
乃他人賣公耳因時開燕言王在安龍主辱臣死兩人泣數
行下也于是文選對邦芑折箭自誓必殺可望會定國自粵
西入安龍擁王而南居間調護文選之力居多可望疑其有
險謀奪其兵柄幽之別室而鑛已憤卒莫有爲之解者可望
脅程源爲兵部尚書時邦芑爲僧矣亦傳之至授詹事府正
詹兩人遂密連舊臣皆交歡可望鎮將此輩樸魯武人酒酣
耳熱輒悉指可望罵曰剥一張賊皮又生一張賊皮耶源又
乘間言于可望文選驍勇可用使功莫如使過文選得還兵

權迨交水戰勝文選馬寶雖爲功首而開導于平日與離間
逆黨奮發忠義於臨時鑛源邦芑其功咸不可泯至是皆旌
之時馬吉翔用事頗忌源芑之來源功名自許入朝卽發吉
翔奸狀吉翔喉言者劾源曾臣事可望非純臣源發憤杜門
不視事芑雖掌憲而督理晉王李定國之軍事者爲金維新
秩左都御史位在芑上以故都御史待命閣下不發芑亦鬱
鬱浮沉而已毓貞與吉翔仇也鑛亦非吉翔所善贈卹皆不
副望公論惜之

二月 大軍取湖南入武靖沅辰遂至貴陽安順巡撫冷孟錐

死之

於是粵西之南太四川之川南川東皆失自可望敗走論功
行賞誇官設吏率皆宴飲恬愉爭功修怨絕不以國事爲念

部官二人

一名金簡字禹藏越人後死
蠻中其一人惜失其姓名焉

次第進諫謂內患雖

除外憂方棘伺我者方鴈行頓又待兩虎之一斃一傷以奮
其勇而我酣歌于漏舟熟睡于積薪之上能旦夕否乎二王
老于兵事者也胡亦泄泄如是定國疑其劾已遽于帝前激
切陳訴王擬杖二臣以謝之朝士交論共執不可移時未決
失陷之報踵至定國始逡巡引謝二臣乃得免

其一爲高勣
亦越人

四月蜀王劉文秀薨

文秀之追可望至貴陽也盡收其潰兵可三萬人練以備邊
漸有成局矣而晉王不悅請召之還弁召諸將之在邊者與
從可望之南犯者論功罪爲分兵多寡之地是以邊警猝至
兵失其將將不得兵迄于大潰文秀以正月還滇擗鬱不自
得每屏人語曰退狼進虎晉王必敗國事病草上遺表曰我
怯敵勁爭可預知臣精兵三萬人皆在黎雅建越之間嘗嘗
金二十萬臣將郝承裔知之臣死之後若有倉卒臣妻操盤
匱以待臣子御羈勒以備誓御請幸蜀以十二家之兵出營

陝洛庶幾轉敗爲功也乃薨晉王惡之

七月晉王李定國秉黃鉞出師

令李承爵出左路壁黃草壩祁三昇出中路壁雞公背白文選出右路壁遵義之孫界壩自三方告急屢促定國師期輒云有待益墮妖人賈自明之惑也自明善幻術多大言言上帝助兵當以某日下爲木偶人數百皆長丈許執幡幢爲行陣久而無驗時已初秋矣定國怒而斬之而諱其事乃出兵授以黃鉞凡古命將之禮無不備先由中路出關嶺後李承爵告急乃移師黃草壩有以兵事諫者曰守石關一夫之力能制勝久之踰石關營於遮炎河祁三昇壁雞公背之絕頂糧少運艱士不宿飽孫界壩孤懸滇蜀之表聲援不及識者俱以爲憂

十月晉王李定國有遮炎河之捷

十二月晉王李定國兵潰於遮炎河

於是雞公背孫界壩之師俱大潰

十五日王出奔

李定國與大軍戰於遮炎河之右小勝遂不設備大軍驟至壓其營而壘明日決戰南兵鎗砲北兵弓矢日中不決

忽大風北來金鎗失火其地山茅野草烟焰障天北兵乘風
馳射定國驚懼棄眾先奔遂大潰十三日變服還滇請王出
走言戰守計者以爲書生不足聽也十四日王乃大集諸臣
會議所之蜀王劉文秀之將陳建等舉文秀遺表請幸蜀定
國曰叢爾建昌何當十萬人之至不如南走緩出粵西急入
交趾難之者曰 大軍乘勝踰黃草壩則臨沅廣南道路中
斷且喪敗之後焉能整兵以迎方張之勢不可黔國公沐天
波進議曰自迤西達緬甸其地糧糗可資出邊則荒遠無際
勢稍緩據大理兩關之險猶不失爲蒙段也王可其議明日
遂發滇官兵男婦馬步從者數十萬人從古奔播未有若此
之衆者時定國以重兵殿後國勢旣播人心思叛艾能奇之
子承業糾狄三品等數人以驍卒千餘伏大寺中謀劫定國
而北定國覘者知其謀以告十八日晡時定國遽率兵千人
嚴隊西走承業等不敢追

順治十六年己正月初四日王至永昌

王發滇時百官護從軍民泣隨者日行不過三十里其後兵
士乏食恣取民間以至所在逃避供頓俱匱而庶僚貧病屢
從離次不前者甚衆崎嶇過大理而定國亦至明日王行定

國請堅守大理許之后數日白文選以孫界壩南潰之兵至
列陣下關衆尚萬餘定國以數百騎赴之文選憤涕叱定國
曰人主以全國全師付王一旦至此誰執其咎定國慚南向
叩首曰帝幸赦臣謂文選曰上既赦我願身一死以贖前罪
文選收涕謝曰王許幾人死終何益王行矣定國遂行又數
日 本朝吳三桂追文選及之戰於下關又戰於丁當山文
選敗南走入山

晉王李定國敗績於磨盤山棄其軍走 大軍引還

先是定國聞文選敗遂渡潞江即古怒江至磨盤山下即古羅眠山巒云高

麗諸將他趨者皆會勝兵萬人因設三伏以待之以泰安伯
竇民望爲初伏廣昌侯高文貴爲二伏總兵王國爲三伏令
曰須敵至三伏舉礮首尾橫擊之 大軍至山下得降者虜
桂生言其計 大軍乃釋馬而步搜伏者望等莽叢積中舉
火礮兩發民望不得已舉礮出戰三伏亦發礮趨下救之戰
于山上短兵相接自卯迄午僵屍堵疊民望血戰不已中流
矢死南兵氣沮猶據險而守及聞定國走將士失望半夜散
去定國當日坐山顛上聞信砲失序大驚曰兵敗矣遂先走
既踰險問王安在知者曰王西行去走騰越已百里路界茶

山緬甸之間定國曰我焉從從王而追者及之君臣俱死無益也姑他往以圖再舉遂棄王而奔二十四日王南行尚未知磨盤之遠野次未定而總兵楊武至言定國遠逃追者將及王遂接浙而行時漸昏黑行數里失道迷大谷中其距故處僅一望宮人竄失公私囊橐多爲楊武劫奪

二十五日扈將孫崇雅叛劫擄殺害尤烈

二十八日扈衛靳統武引其從叛去

王以從臣多叛決意入緬遂出鐵壁關關外卽緬地矣緬酋使至其自稱於國也曰金樓白象王蓋處則樓居出則乘象

足不履地也進表天朝則稱緬甸宣慰司使臣某國人稱之則曰某某法此言公道主人也至是奉迎具表如常儀復奏曰大王遠臨百蠻驚畏請從官以下勿佩戎器馬吉翔傳旨從之諸從臣皆諫曰猛虎所以威百獸者以有爪牙故也奈何自棄其防以啟戎心不聽是日王至蠻漠緬人執禮甚恭并進衣衾食物華亭侯王惟恭謀擁世子還入關由茶山出鶴麗不果

二月初一日王至水次

緬人艤四舟以待王一妃及世子一司禮監李國泰一文安

侯馬吉翔一浮水東下卽大金沙江其南與海接古稱黑水
此其一也從官無舟或水或陸聽自爲計先在騰越從官以
下及婦寺等尚四千及至蠻漠止一千四百五十餘人至是
僅六百四十六人而已

十八日王至井梗

因緬人奏宮室未備故暫憇也

二十日緬酋迎大臣議事

王遣馬吉翔弟雄飛及鄔昌琦往及至酋亦不見令通事傳
話所問者皆神宗時事二人未習中朝典故竟不能答緬人

哂焉最後出神宗時勅書相示其實文較今微異以爲僞又
以黔國公沐天波征南將軍印驗之無異遂不言是役也行
人不才遂開遠蠻以不恭之漸

三月黔國公沐天波等謀奉王往就晉王李定國之師不果
天波及綏甯伯蒲縵總兵王啟隆等謀奉王往護撒孟良以
就定國馬吉翔不從遂止是月也緬人戕我從官以下數百
人通政司朱蘊金姜承德自縊死自定國率殘潰之衆分道
入緬焚掠劫殺千里相望緬人遂大發兵守隘與官軍忿忿
益甚從官以下從陸者不知王尚在井梗也竟抵緬都之亞

哇城緬人以為寇至發兵圍之被殺者過半餘安置遠方後竟無存焉

四月咸陽侯祁三昇帥師迎王

三昇上表迎王緬人請勅止之諫者曰此我君臣出險之一時也不聽使丁調鼎及部司楊生芳往以勅書止之曰我已航閩將軍善自為計三昇捧勅痛哭以為真航閩也遂撤師五月初四日緬人以龍舟鼓樂迎王次於者梗

亞哇城下有地名者梗即大鷓鴣城舊址也界大金沙大盈江之間地饒而險緬人結草為廬編竹為城王入居之百官

咸聚草次

初八日緬人來貢禮儀甚腆

自潰衆四掠百官受荼毒之慘然未敢誚人主也三昇奉勅撤師之後緬人以王威令尙行恐一旦出緬紆禍無計故迎王復奉以為緩急自救之策且潛阻內外聲聞不通而王益困矣

八月十五日緬酋魯黔國公沐天波執臣禮以見學士楊在行人司任國璽疏劾之不報

緬俗八月十五日羣蠻覲見酋張嘉會以享之至是給天波

至脅令從緬制白衣椎髻跣足領諸海郡及熨夷酋長而拜以夸示遠近天波歸而自首且曰我爲王屈也在等以天波貪生辱國疏劾之留中不發

九月緬人進米王以給從官

順治十七年庚子鞏昌王白文選帥師迎王次亞哇城不克而還文選自大理之敗間道渡隴川潞江踵王之後以王且入亞哇城矣二月中臨江不知王之所在還兵南甸者久之至是招集流亡有精兵萬餘人是年七月復至江潞諭緬人假道迎王不許遂攻之垂克矣緬酋懼求救止之文選不奉諭謂

使者曰前者祁將軍來諭云已航閩若前諭爲真則今勅爲假使今勅爲真則航閩之後何由而來君非臣何以威衆臣非君何以使人蠻人不足信也使者曰諾旣去不復至緬人守益堅文選望鷓鴣城痛哭引兵去

九月椎僞寶以頒從官之不能舉火者

先是楊武孫崇雅之叛輜重散亡殆盡至蠻漠惟中宮餘金盆銀盤各一又爲輿夫盜逃而庶僚之貧者饑寒藍縷鳩鵲不足喻也馬吉翔李國泰以語激王怒擲皇帝之寶令碎之以濟從臣典璽李國用叩頭不敢奉詔吉翔國泰竟鑿以分

餉焉時吉翔等擁貲自贍且縱博酣飲高歌達旦王寢咫尺不顧也更值蠻人來市無尊卑少長皆短衣岸幘與蠻婦坐地交易襍以謔笑中國紀綱蕩然蠻人視之齒冷矣

順治十八年辛丑二月鞏昌王白文選會晉王李定國之師大敗緬兵於錫波江

先是定國入緬中餘衆不過千許檄調諸將皆以磨盤山之敗口實不相附遂引而南至順蒙界外畧地而食勢實窘迫會慶國公賀九儀以全師自廣南渡九龍江赴之精兵萬人攻孟艮拔其城地饒魚稻諸將稍集軍聲復振久之九儀以

定國悍矣難近謀欲引去事泄定國格殺之并其衆文選先居木邦之南甸相去二千里不相聞也迨攻緬兵還以不克爲恥知定國取孟艮并有九儀之衆乃爲書謂之責以大義定國遂全師而西會文選於半途相與刑牲歃血誓必克緬緬人知之拔其豪遣邊牙鮮邊牙猓爲大將集兵十五萬人過於錫波江上臨戰巨象千餘夾以鎗礮陣橫二十里鳴鼓震天大噪而進二王之兵不及什一且戎器耗失所操惟長刀手槊白楮而已定國誓衆橫擊之大敗緬兵僵死萬計殺其將邊牙猓而邊牙鮮猶收餘衆柵大榕樹林中蔭可百里

其夕鳴鼓竟夜如列陣比曉盡走還無一存者二王遂渡錫
波江臨大金沙江以襲緬城

四月晉王李定國等迎王不果引兵還至亦渺賴山師大潰

先是定國等兵臨大金沙江諭緬人假道入覲弁責其象馬
行糧爲人邊之計緬人不聽盡燒其江船沿江據險設礮以
守月餘定國等以糧少氣沮緬中耆者曰從此而北至鬼窟
山有大芭蕉林伐之作筏可渡旣渡尚有大居江阻之地饒
材木居民數百家燒鑛冶鐵舟可立具也定國從之浮蕉爲
梁得濟伐材設廠造舟焉未幾緬人斷浮橋擾廠所而軍饑

疲作死相繼時軍行皆挈眷以行老幼纍纍爲累不堪不得
已爲還軍之策或曰緬中瘴癘夏秋爲甚加以千里無烟人
何以濟孟良不可得而返矣有地名風沙擺古者在西南海
上行月餘可至其地高涼其產魚稻蓋往諸定國等又從之
行至亦渺賴山下其山亘數百里登峯一覽竟見西南大海
矣是夕文選裨將趙得勝惑其衆擁文選北還且曰王母爲
賀九儀之續文選入山據險自保數日後定國不得已引餘
兵三千間道還孟良其後文選入邊遂迎降於 大軍

五月緬人弒其酋弟爲緬王

自二王兵躡入緬地其民罹兵火之厄死者幾半國人懟其
酋曰王迎永歷故永歷來階之爲禍者王也會曰我迎王不
迎賊也賊禍我王不禍我奈何以是爲怨乎於是上下相猜
忌適定國等來攻酋之弟守景邁景線引蠻衆五萬人入援
弁大出金帛以犒其衆諸蠻奮發各爲戰守其畧一出于酋
之弟國人愛之遂歸心焉是月二十三日縛酋置篋輿中投
之江立其弟爲王遣使來告且索金賀不報

六月緬人給大小從臣盡殺之并圍行營漢人多遭其禍

前年八月黔國公沐天波屈拜緬酋其後外來兵迎王緬大

恐又禮迎天波乞詔諭止之且許資象馬糧糗相助入邊而
外兵飄忽銳進速退是以蠻益輕我及二王亦渺賴山之潰
蠻尤肆志然尚未敢爲逆也時 本朝吳三桂旣留鎮其固
山楊坤謀效黔國公世守滇土以爲盤石之計必入緬取王
以獻乃可遂上疏固請嚴檄緬酋令獻王自効緬人於是謀
殺從官以孤王勢使人來曰賊衆潰矣緬土安矣請天朝大
臣詛盟以相信也天波欲辭馬吉翔李國泰曰蠻人敬鬼重
誓可往也乃行日向午緬人以兵三千圍行營索漢臣少長
貴賤皆飲刃而死有竄入王所伏匿者亦搜而殺之宮中兩

貴人及命婦自縊死者相望伏屍枕籍良久緬人護駕官大呼曰毋得驚害老王亂始定移王他所緬僧使其徒來進食數日乃得濟是日赴咒水之會死知名者松滋王某黔國公沐天波文安侯馬吉翔都督馬雄飛綏甯伯蒲纓華亭侯王惟恭侍郎蔡士廉楊在御史任國璽鄔昌琦部司楊生芳鄧居詔學錄潘璜典簿齊應選總兵魏豹王啟隆內臣李國泰等二十四人其自縊死行宮者吉王慈燿王妃張氏錦衣衛官趙鳴鑑王大雄等二十三人嗚呼行營諸臣雖賢不肖間殊其崎嶇守死則一至是同爲一邱之貉而王已爲三桂几

上肉矣緬人何足恨耶明日王驚悸致病緬人恐王又不測無以致辭於三桂乃治潔行宮迎王入居之復貢衣被銀布等物

十二月初三日 本朝吳三桂帥師臨江緬人執王以獻三桂既以大兵臨緬城大江緬人奉以金盤十六枚置饌以迎卽日緬蠻來給王曰李定國兵又至矣馬步軍數萬列江澗索王甚急語未竟蠻人遂裂王所坐以行後宮號哭震天步從五里外乘舟渡河舟大不及岸三桂使將負王登岸王問曰卿爲誰對曰臣平西王前鋒章京高得捷也王默然

江縣

初九日 本朝吳三桂以師擁王還滇三桂遂以捷聞

晉王李定國薨

緬自萬厯中絕貢且據有木邦麓川及八百媳婦之地雄視

西南然與古刺暹羅兩國為世仇王自蠻漢舟行從官雲散

有馬九功者入古刺有江國秦者入暹羅暹羅酋以女為定

國次妃一作暹酋以女妻國秦於是間道通殷懃謀連兵攻緬九功

等亦為古刺招到潰兵得三千人亦致書定國相與犄角兩

國之兵將發會三桂執王旋滇謀者以告定國聞之蹒跚號

哭自擲於地者百許不食三日自表於上帝以所死憤鬱致

病七日而薨暹羅古刺之師失望而返

康熙元年壬寅四月二十五日吳三桂以帛進王所王遂薨世子

及王姪殉之明亡是年三桂即晉爵為親王益甲踰萬人移

家口於漢中美厥功也其後緬蠻至者云晉王李定國所葬

地至今春草不生蠻人過之輒跪拜而去

師範曰有明之世如錢甯江彬陸炳以及王振劉瑾魏忠賢

惡盈朝野人無不知者永明王奔竄流徙猶恃王坤李國秦

馬吉翔為阿孀設廷杖發內批幕燕釜魚借此自雄陳叔寶

是何心肝哉崇禎之天下雖覆于闖亦殘于獻而史公法可之

信高傑堵公錫之招李錦郎李赤心吳公統楊公之結孫可望
後皆不得其用或反爲所戕靈鳥化凡羽者有之矣梟獍而
翼其爲麟鳳也能乎施氏雜錄云緬酋旣弒其兄定國聞報
率騎疾馳迎王緬閉弗與定國不得入環城數里百計攻擊
三日不下時從官殺盡惟天波未死緬酋將至城上板夾而
解之王遣遙諭曰事已不可爲矣文武各官俱已見害今鋸
解者沐上公也請王各自爲計否則我亦萬無生理定國及
諸將士皆下馬羅拜大呼痛哭聲振天地王聞之哭亦失聲
次日定國憤恨悲號遂大勦孟坑城外鷄犬不留而去

平定三逆述畧

國朝定鼎中原將三十年因三逆之叛又用兵十年而後天下
大定三逆者吳三桂耿精忠尚之信也

太宗文皇帝時明登州參將耿仲明隨副將孔有德航海來歸
已而廣鹿島副將尚可喜亦降二人與有德皆遼人仲明則精
忠祖可喜則之信父也時仲明封懷順王與恭順王有德同封
可喜亦封智順王三桂山海衛人明末爲總兵官鎮山海關聞
京師陷乞兵於我朝適睿親王多爾袞兵至翁後遂降於軍
前封平西王三人與有德皆隨大兵入關三桂西追流賊入蜀

順治六年進封可喜平南王仲明靖南王使定廣東各率其部
兵以行仲明道卒子繼茂襲與可喜同定廣東遂鎮其地後移
駐福建繼茂卒精忠襲爵時定南王有德先戰死於粵西故平
西平南靖南世稱三藩三藩中三桂功最多隨大兵定蜀定滇
取永明王於緬甸平水西安氏皆與有勞故恩禮獨隆進封親
王令統所部留鎮滇黔所屬文武官聽自選用又擢其部將王
輔臣爲陝西提督李本深爲貴州提督吳之茂爲四川總兵馬
寶爲雲南總兵三桂鎮滇久僭擬踰制漸著異志日驕蹇精忠
亦篤黠不法大爲閩人害惟可喜素恭順能恪守藩服 仁

皇帝以三桂可喜宣力有年年皆老且三藩分布半天下將成
唐室方鎮之勢非久安計欲令釋兵還朝以全終始銷亂萌適
可喜疏請乞骸骨率所部歸遼東乃 特允其請此康熙十二
年三月也三桂精忠不得已亦以是年七月疏請撤兵而實無
行意三桂陰勒士馬禁遏郵傳並約結部將之在他省者精忠
亦與相應和皆屢遷行期朝議分遣哲勒肯陳一炳梁清標赴
諸藩與籌撤兵後事宜且趣之行於是十一月二十一日三桂
遂發兵反殺巡撫朱國治自稱天下都招討兵馬大元帥以明
年爲周元年僞號昭武李本深首應之雲貴總督甘文焜在貴

陽聞變疾馳至鎮遠爲賊兵所圍自刎死有郎中黨務禮等在
黔督辦三桂入京夫船疾馳至京上變湖廣總督蔡毓榮亦奏
至 詔削三桂官爵命順承郡王勒爾錦爲甯南靖寇大將軍
貝勒察尼副之率師往荊州進討又以滇蜀接壤令西安將軍
瓦爾喀赴蜀刑部尙書莫洛經畧陝西軍事粵西地近貴州則
以有德壻孫延齡爲將軍鎮之又命前鋒統領碩岱先進據常
德以遏賊鋒兵未至而賊已逼清浪以小除夕陷沅州總兵崔
世祿被執巡撫盧震棄長沙奔岳州十三年正月賊至常德原
任提督楊遇明明居城中爲內應常德亦陷提督桑格援兵至

不得入退還澧州澧州已應賊長沙副將黃正卿參將陳武衡
又以長沙降賊四川巡撫羅森提督鄭蛟麟總兵譚洪吳之茂
亦叛全蜀皆失二月孫延齡又反於廣西殺都統王永年執巡
撫馬雄鎮據有桂林平樂三月賊兵至岳州參將李國棟應之
岳州亦陷耿精忠亦以是月反給執總督范承謨幽之民舍巡
撫劉秉政降之是時三桂蓄力已久天下皆震其威聲白首舉
事親至常澧督戰兵鋒甚銳是以四方響應雲南貴州四川湖
南廣西福建相繼失人心皆動搖幸 廟謨鎮定先事布置旣
命勒爾錦等赴荆瓦爾喀等赴蜀而武昌南昌河南安慶江甯

諸處先後遣重兵鎮守又駐兵於兗州太原以備應援楚警則調安慶兵援楚而兗州兵移安慶又調兵駐兗州以繼之蜀警則調西安兵援蜀而太原兵移西安又調兵駐太原以繼之遇有徵發絡繹奔赴不淹旬月故叛亂相尋終獲戡定皆用此法也而京師先有楊起隆之變起隆者市井無賴僞稱朱三太子布其黨李株等糾約滿洲各官家奴期以十三年元旦入朝時各殺其主卽以主之官官之鑲黃旗監生郎廷樞家奴夜醉漏言廷樞聞之急上變遂捕得株等二百餘人誅之王大臣弁奏誅三桂子孫之官於京師者乃戮其子應熊及孫世霖以淨根

葉起隆尋亦捕得伏誅京師訛言始息未幾察哈爾又蠢動時方調邊外各蒙古兵察哈爾右翼王子布爾尼謀拒命他部多視爲向背

上聞之立命大學士圖海率滿洲兵三千疾馳往及其未發殲之於是諸蒙古帖服無後顧憂得專力南征矣而其時反者不特三桂延齡精忠也又有襄陽總兵楊來嘉叛於穀城河北總兵蔡祿叛於懷慶江西則饒州兵變餘干賊蜂起騷及江南之徽州別賊陷湖口彭澤江南之池州亦有賊竊發

上以賊渠乃三桂也三桂滅則諸賊自散趣察尼分兵急攻岳

州僞將軍吳應麒據守堅不可拔乃又命貝勒尙善爲安遠靖寇大將軍貝子彰泰副之專攻岳其餘諸省則以貝勒洞鄂爲定西大將軍與莫洛由陝勦蜀康親王傑書爲奉命大將軍由浙勦閩孫延齡之叛提督馬雄亦以柳州降賊則命尙可喜及總督金光祖勦禦而以安親王岳樂爲定遠平寇大將軍繼之分遣甫定忽又有王輔臣之變輔臣本姜瓖部校瓖反時殺瓖來降擢侍衛從大兵定湖南入黔滇隸三桂部下久擢至今官三桂初反時誘以僞劄輔臣令其子繼禎入京呈首

上嘉之特給世職并繼禎四品官尋又陰通三桂至是從莫洛

進甯羗忽反兵攻莫洛戍之遂回平涼據守此皆十三年事也十四年秦州蘭州鞏昌定邊靖邊臨洮慶陽綏德延安相繼失時三桂散僞劄各路煽誘給輔臣軍資數十萬又令賊將王屏藩吳之茂等出蜀肆擾故所在響應惟提督張勇總兵孫思克王進寶陳福不從陝省得不全陷已而諸將先後復秦蘭延鞏諸郡獨輔臣據平涼悉其精銳依山結壘勢張甚三桂親至松滋遙與相倚將入犯彝陵荊州我湖南諸將方奉 命進兵岳州長沙以分賊勢而吳應麒於岳州城外浚濠三重設陷坑木椿守益固長沙則賊將馬寶來援亦堅拒不下諸將皆不能尺

寸進耿精忠既據全閩又遣賊陷浙之温州黃巖處州及江西之建昌撫州廣信諸郡廣東潮州總兵劉進忠碣石總兵苗之秀亦與通潮惠竝失時杭州將軍賴塔總督李之芳以兵扼衢州賊不得過衢而陸路有僞都督曾養性僞將軍祖宏勳等連屯二十五營於長石嶺諸處水路則有僞都督朱飛熊張萬恭許英等率水賊萬餘舟三百分泊於小梁山諸處浙東危甚傑書大兵至亦觀望不敢進屢奉 詔趣督始進兵瑪哈達復處州傅拉塔復黃巖而温州爲曾養性據守迄不下江西之地精忠既陷其東數郡三桂又遣僞總督黃乃忠等合兵數萬自萍鄉窺袁州西路亦告急先是

上以江西賊衆命岳樂停往粵西留江西辦賊至是以簡親王喇布爲揚威大將軍自江南移江西代之趣岳樂進兵長沙岳樂畏三桂凶燄而閩事差易藉手也已率兵復建昌令額楚復廣信希爾根復饒州欲由江西入閩辦賊

上不許趣赴長沙益急此十四年事也計此二年中叛變四起秦蜀楚粵閩浙如鼎沸選將調兵轉餉日不暇給自古藩鎮之亂未有甚於是時者十五年春以洞鄂等屯兵平涼久不克命圖海爲撫遠大將軍往莅師三桂方遣王屏藩出漢中譚洪出

西河吳之茂出軍家河合犯秦州爲輔臣聲援弁令雲南土司
總兵祿道清率獮獮入平涼助守圖海至督諸將一戰大敗賊
於平涼城下輔臣懼遂率僞巡撫陳彭僞總兵周揚名王好問
及祿道清等降王屏藩等遁自是秦省畧定會閩賊耿繼祚再
入建昌肆焚掠忽棄營去

上知閩中必有海寇入故撤兵自救乃趣傑書賴塔速進兵敗
僞將軍馬九玉於衢河西敗僞總兵林福於大溪灘乘勝復江
山縣至仙霞關僞將金應虎獻關遂長驅入浦城建陽建甯相
繼下曾養性聞之亦以温州降大兵抵延平精忠大懼先遣其

子顯祚繳送僞印師至福州率所屬文武出降於是閩浙亦定
時東西兩巨寇旣降乃得以全力辦三桂初三桂因王輔臣之
變欲由秦蜀入犯及輔臣反正圖海等守陝無隙可乘而岳樂
已由袁州進兵長沙三桂乃使胡國柱入長沙固守馬寶營城
外爲犄角而親率兵自松滋來屯嶽麓山盡調彝陵南漳諸賊
楊來嘉洪福等至合力抗拒別使僞將軍高大節率衆數萬圍
吉安以梗入粵之路陰結尙之信授爲招討大將軍之信遂反
遣人禁其父可喜於私第率藩下人易旗改服擊將軍舒恕於
省城恕引兵出走副都統莽依圖自肇慶突圍出總督金光祖

巡撫佟養鉅皆降之韶州南雄相繼陷舒恕等走南安南安又陷乃守贛州孫延齡馬雄皆助三桂遣兵寇江西高大節已破吉安入城守

上預知賊不得逞於秦必力保湖南拒守乃趣勒爾錦察尼尙善等分路進兵勒爾錦敗賊於虎渡口察尼敗賊於太平街尙善遣舟師入洞庭克復君山已而勒爾錦等再戰不利引還尙善舟師亦未能斷賊餉道又詔將軍穆占爲征南將軍自陝率滿洲兵及輔臣降兵至荊州並選荊州兵之精銳者率以助攻長沙賊方擾醴陵萍鄉欲斷岳樂後路喇布自江西分兵禦

之賊之陷吉安者將軍哈爾噶齊等圍之此十五年事也十六年春吉安賊遁莽依圖乃進兵南安原任提督嚴自明以城降賊黨郭義亦遁我師遂踰嶺克南雄直至韶州有僞監軍道傅宏烈先以書來謂大兵速進廣東則廣西一省宏烈可以一面當之至是來迎於韶尙之信聞大兵入粵先遣其弟之瑛迎降金光祖亦自肇慶至時可喜已歿命之信仍襲其父爵之信以書招原任高州總兵祖澤清澤清亦以高雷廉三郡降原任瓊州總兵佟國卿亦以瓊州降於是廣東粗定耿精忠之歸順也上命率其藩下兵隨征海寇時海寇鄭錦連陷汀漳興泉邵武

諸郡我兵以次收復劉進忠苗之秀亦以潮州碣石來歸錦部將劉國軒在惠州揚帆去於是海寇亦稍靖精忠以海寇平奏請入京服罪其屬下徐朝弼等首告精忠雖歸降仍遣王進功通海寇與劉進忠結腹心藏黑鉛於王昇家欲俟大兵旋日再作亂將降之前三日殺范承謨以滅口又遣王子玉至三桂處乞援

上命議政王等按其事皆實凌遲處死於是閩逆之局亦結三桂既失輔臣精忠之信等援勢漸孤乃爲畫地死守計以衡州爲僞都自長沙移居之聯絡孫延齡馬雄等爲肘腋助時岳樂攻長沙穆占及喇布攻衡永皆未克賊增兵自宜章樂昌悉力來拒尙之信雖已反正仍與三桂通三桂陰援之遣胡國柱馬寶再犯韶州額楚與之大戰莽依圖出城夾擊賊始遁此十六年事也十七年穆占進復柳州桂陽興甯宜章諸處又招降僞總兵王商等僞將軍林興珠詣尙善降賊乃盡銳逼永興而軍我都統伊里布戰歿再戰副都統哈克三又歿碩岱宜思孝營壘悉被衝賊據之環攻永興碩岱等入城死守喇布不敢救穆占遣布舒庫尼雅漢來援亦不敢進賊三面攻圍自八月二日至二十日晝夜不息城壞於礮以竹篾布囊盛土補之且築且

戰瀕危者屢矣二十一日賊忽拔營去乃三桂已死諸賊皆赴衡州故也三桂初病有犬登其案而嗥已而膈噎症益劇又下痢遂於是月十七日死賊黨吳國貴夏國相祕不發喪潛調承與諸賊胡國柱等至仍謀拒守時尙善已歿於岳州以察尼爲安遠大將軍赴岳統其軍先是林興珠之降也謂岳城糧皆取給於常德而我舟師僅營於君山賊之往來如故也宜分泊於香爐峽諸處弁立陸營於九貴山以斷長沙衡州之路賊可坐困

上是之命察尼如其法以困岳水陸之圍始密賊將杜輝潛遣人來約降事泄爲吳應麒絞死城中糧日乏我兵乃急攻之十八年正月僞總兵王度冲陳珀降應麒棄城遁官兵遂復岳州岳州旣復長沙震恐賊將皆棄城去我師由長沙進衡州吳國貴夏國相等亦遁我師入衡州追敗國貴於永州復其城國貴尋踞武岡與胡國柱死守林興珠奮擊敗之國貴中噤死餘賊遁彭泰又追敗之遂復武岡喇布遣提督趙賴取寶慶寶慶亦復時勒爾錦等在荊州亦渡江勦賊賊已潰所過松滋枝江宜都諸縣皆下弁復澧州僞將軍洪福以舟師降貝子準達進常德賊已焚廬舍舟楫去而三桂孫世璠在雲南已僭卽僞位勒

爾錫尋奏胡國柱在辰龍關吳應麒在辰州以木石塞隘口跨路立五營山路險惡止行一馬其陡絕處徒步亦難上

上切責之乃命察尼辦澧州以南軍事勒爾錫辦荆岳彝襄軍事以岳樂勤勞以命率大兵之半還京以彰泰爲定遠平寇大將軍代之進取雲貴此由湖南入滇黔之師也先是十六年傅宏烈之降投爲廣西巡撫撫蠻滅寇將軍令募兵進取廣西莽依圖額楚旣敗賊於韶命額楚守韶莽依圖隨宏烈後繼進會馬雄與孫延齡交惡治兵相攻宏烈等遂乘機進克梧州招潯州鬱林皆下之直抵平樂延齡已爲吳世琮殺死世琮水陸來

犯宏烈等戰不利引兵退十七年戰於賀戰於藤又敗賊直逼梧州是時三桂已死而世琮在廣西轉猖獗十八年正月宏烈莽依圖率死士奮擊大敗賊始復潯州馬雄已死其子承蔭率僞將齊人龍等降世琮圍之於南甯承蔭守頗力莽依圖進敗賊於新村世琮負傷走南甯圍解弁復太平府命莽依圖卽由南甯進雲南宏烈亦請由慶遠進雲南

上壯其志以喇布代守桂林聽宏烈進師十九年承蔭又緝殺宏烈以叛粵地再擾於是命駐守潮州之將軍賴塔帥師守廣東初尙之信雖降仍懷兩端趣其援宜章援韶州援梧州皆托

故不行三桂死始聽調從征廣西至是之信護衛張永祥張士
選赴京首其謀叛事

上命侍郎宜昌阿以巡海爲名赴粵密按其狀部將王國棟證
之事皆實宜昌阿密檄金光祖執之信於武宣之信弟之節等
在省城聞變殺國棟欲爲亂賴塔以兵圍其第皆就擒之信尋
伏誅粵東得不擾會莽依圖病歿於軍乃命賴塔爲大將軍代
莽依圖進取雲南此由粵入滇之師也諸將之在秦省者自平
玉輔臣後以秦民勞敝暫停進蜀及三桂死 詔圖海進京面
授機宜始議進兵諸將張勇孫思克猶請俟時惟提督趙良棟

王進寶請身任其事十八年十月進寶復鳳縣克武關擒僞總
兵羅朝與直抵漢中王屏藩遁我兵分三路趨保甯十九年正
月賊二萬餘來拒進寶大敗之追至錦屏山賊營於城外我兵
奪橋而進遂克保甯王屏藩及僞將軍陳君極自縊死生擒吳
之茂等乘勝至順慶順慶亦復趙良棟之分路進蜀也先遣兵
復徽縣由畧陽進克陽平關十九年正月從白水壩渡江龍安
府僞總兵姜應熊降遂復龍安至明月江賊斷橋拒守良棟趨
兵浮渡令總兵王進才等分兩路取成都自率大兵繼進僞將
軍汪文元降於綿竹至成都僞巡撫張文德率文武出降遂復

成都圖海亦以是時復興安府楊來嘉尙擾夔巫間提督徐治
都擊敗之於巫山來嘉遁夔州亦復譚洪率所部降將軍烏丹
克重慶彭時亨亦降趙良棟敗胡國柱於建昌遂率兵進雲南
此由蜀入滇之師也時察尼在湖南已克辰龍關進取辰州總
督蔡毓榮又復銅仁府及麻陽縣於是命彰泰速進雲貴其滿
兵無馬者撤之令察尼率以還京勒爾錦傑書亦先後撤兵還
圖海率王輔臣還輔臣至陝西自縊死八月彰泰蔡毓榮自沅
州進十月克鎮遠府偏橋平越龍里以次收復抵貴陽吳應麒
先遁遂復貴陽遣提督桑格據雞公背鐵索橋諸險招李本深

降之其餘安順石阡等府相繼下貴州悉定會賴塔自廣西進
兵亦屢捷二十年正月朔抵安籠所敗偽將軍何繼祖於石門
坎遂復安籠繼祖遁去合偽將軍詹養等率數萬衆陣於黃草
壩列鹿角挨牌驅象助戰二月二日我兵自卯戰至晡大敗其
衆奪二十二營生擒詹養王有功等獲象馬無算二十一日彰
泰賴塔兩路兵遂會於曲靖整隊合進屯雲南省城十里外之
歸化寺逆酋吳世璠遣偽將軍胡國柄劉起龍黃明等率賊數
萬來拒我兵大敗之陣斬國柄起龍追殺至城下掘長壕困之
而趙良棟之師亦自蜀至圍益密先是賊因官兵進勦欲分我

兵力遣胡國柱夏國相馬寶等分陷建昌叙州永甯馬湖諸處
又嗾譚洪彭時亨再叛擾夔巫間至是世璠以省城危急調諸
賊回救

上預勅諸將各路追躡弗令得至省城於是諸將奮擊遂無一
得至省者僞將軍韓天福與土司那天鳳縛僞總兵王來吉以
武定降穆占敗僞將軍楊應選於平遠遣人招之亦降僞定遠
大將軍張國柱僞總兵徐衷明李三彬羅文獻郭壯興范應泰
各率所部降僞將軍李發美舉首世璠所與達賴喇嘛書以麗
江鶴慶二府降譚洪已死其子天祕亦降馬寶遁於楚雄衆盡

潰與僞將軍巴養元偕降

上命械寶至京磔之雲南省城有潛出降者謂世璠勢已蹙惟
堅守待外援十月八日彰泰等遂合楚粵蜀諸路兵合力環攻
連日夕不息二十八日僞將軍線絨吳國柱吳世吉原任都統
何進忠林天擎等謀執世璠及郭壯圖以獻世璠聞變自殺壯
圖及子宗汾亦自殺二十九日線絨等開門降遂擒僞大學士
方光琛等磔之戮世璠尸傳首京師夏國相竄於廣南尋亦來
降彰泰以其爲三桂壻送京師伏誅胡國柱遁於雲龍州度不
能脫自縊死其餘僞文武官皆降雲南底定

上乃盡撤滇粵閩藩下兵歸京師贈卹節諸臣甘文焜范承
謨朱國治馬雄鎮傅宏烈等分別諸將功罪黜陟之其滿洲兵
出征時貸子錢治裝者發帑代之償大赦天下與民休息從此
內地不復用兵億萬年丕丕基定於此矣

師範曰世璠非通喇嘛乃割維西中甸賂青海乞援文檄爲
高土司所截滇破而師不至高卽雪君名裔映子映厚孫厚
德以罪發江南時馬寶之子以援字槃什亦與雪君善獄中
著等韻其自序云有生雖微幸以一節鼓吹聖明其志可憫
矣彼寶且熊虎之姿不知反正爭烈褒鄂悖哉

也是錄

順治十五年戊戌十二月十五日王自滇起行

十六年己亥正月初四日王至永昌府

閏正月十五日自永昌府起行

十八日至騰越

自永昌一路入緬文武官四百餘員隨從之役三千餘人其
時隨護者則靳統武也

二十四日甫下營而未炊忽楊武兵傳言後面吳兵隨到各營
兵士俱忙亂奔散馬吉翔與司禮李國泰催王卽行遂踉蹌

而奔君臣父子夫婦兒女不復相顧兵馬亂處火光竟天各營行裝皆被搶劫貴人宮女俱為亂兵所掠

二十五日至鐵壁關孫崇雅叛肆掠輜重凡文武追扈稍後者悉為所擄

二十六日靳統武棄王由斜谷而去

二十八日王入緬關緬人要請各從臣去弓矢刀杖勿驚擾緬人不從馬吉翔命悉去戎備眾乃遵行是日抵蠻漠緬人迎貢亦頗循禮

二十九日黔國公沐天波與皇親王維恭典璽李崇貴等計曰

我等須引世子入茶山既可在外調度各營且王在緬亦可遙為聲援或不至受困王妃不許

三十日起行

二月初一日王至大金沙江僅得四舟止可供上用餘各自買舟走小河又訪問得陸行亦可達彼岸即有從陸者計諸臣隨行之眾于騰越起行尚不下四千此時簡閱止一千四百七十八人從舟行者六百四十六人餘者從陸

初四日馬吉翔李國泰不候太妃世子即命放舟太妃大怒曰連我也不顧欲陷王于不孝耶眾乃止

初六日長行

十八日至井棟緬人爲阻每日止行二三十里

二十日緬人來報我兵四集請勅阻之是晚諸臣悉會舟前議誰可往衆各推委惟鄧凱與行人任國璽請行馬吉翔恐二臣暴其過惡因私謂緬人曰此二人無家去則不還矣旋復報各營已撤去遂輟不行

二十四日緬酋來邀大臣過河議事王命馬雄飛鄔昌琦往至則緬酋不出惟令通事傳語所問皆神宗時事二臣不能答緬人哂之因所贊勅書與神宗時所賜御寶相去微別以爲

僞又出黔國公征南將軍印相對乃信蓋緬人于神宗萬曆二十二年因亂來朝請救朝廷却之是年遂與緬絕出此蓋以示前代未嘗受恩也

三月黔國公沐天波與綏甯伯蒲縵總兵王啟隆邀馬吉翔等集大樹下天波曰緬酋遇我日不如前可卽此走護臘撒孟良諸處尙可圖存吉翔曰如此我不能復與官家事將三宮交諸公爲計可耳衆默然遂散時白文選率兵于二月初五日已抵緬亞哇迎王相去不過六十里寂無知者然皆不探聽虛實惟焚掠爲事而已

十七日起陸諸臣至亞哇城對河屯駐緬酋疑曰此等非避亂
乃是陰圖我國耳發兵圍之傷者甚衆因分居各村總兵潘
世榮降于緬通政司朱蘊金中軍姜承德皆自縊死

四月蠻漢來報有我兵祁姓者來迎請勅止之吉翔卽請以錦
衣衛丁調鼎考功司楊生芳往至五月望後始還祁兵得勅
不進吉翔復與緬官之把隘者勅一道云我已航閩後有一
切兵來都與我殺了

五月初一日緬酋遣都官備龍舟鼓樂來迎

初五日王去井梗

初七日至亞哇城對河安扎

初八日至者梗卽從陸諸臣所駐舊地也先建草房十間請入
居之外以竹爲城每日守護者百餘卒其諸文武自備竹木
結宇而居

初九日緬酋遣貢甚厚亦優荅之時緬婦自相貿易襍踏如市
諸臣恬然以爲無事屏去禮貌皆短衣跣足闌入緬婦貿易
隊中踞地喧笑呼盧縱酒雖大僚無不然者其通事爲大理
人私語人曰前者入關若不棄兵器緬王猶備遠迎今又廢
盡中國禮法異時不知何所終也

八月十三日緬酋來招黔國公沐天波渡河弁索禮物蓋緬酋以中秋日各蠻皆貢獻故責幣帛以彰聲勢天波至脇令椎髻跣足以緬禮見天波不得已而從之歸而泣告衆曰我所屈者爲保全王也若使執抗不知將作何狀衆且不以我爲罪府乎于是禮部楊在行人任國璽皆疏劾之留中不發是月王患腿瘡旦夕呻吟而諸臣日以酣歌縱博爲樂中秋之夕馬吉翔李國泰呼梨園黎應祥者演戲應祥泣曰行宮在近王體不安且此時何地而行此忍心之事乎雖死不敢奉命吉翔等大怒令痛鞭之時蒲纓所居亦密邇西內纓大開

博肆呼叫無忌王聞而怒之毀其居纓仍如故

九月十九日緬人進新穀王以賜從臣之窘迫者馬吉翔狗私散給鄧凱見之大罵吉翔于行帳吉翔旗鼓吳承爵捧凱而仆傷其足遂不能行

十七年庚子七月緬人復招黔國公沐天波渡河天波力辭緬使曰此行不似從前可冠帶而行至則遇之有加禮始知各營將臨緬城晉王李定國率兵迎王有疏云前後具本三十餘道未知曾達否今與緬王約議于何處相迎伏候指示而諸臣在緬燕雀自安全無以出險爲念者緬營索勅朦朧而

去外兵久候音問俱絕遂拔營去後緬人來言此輩全無實心爲王惟向各村焚掠亦不計議恢復方畧或索本國象隻糧草相助而行乃惟播惡于無辜恐不邀天之庇也時馬吉翔楊在以潘璜能通緬語囑其扶鸞曰仙告我矣某處有兵來迎當以某日至岡上以邀賞取悅又恐定國至衆將疾攻其惡不得自恣故矯旨令勿入緬而一切惟事牢籠諸臣奸醜蓋難枚舉至文武陞遷仍由權賄國事至此尙可問乎九月馬吉翔奏有大臣三日不舉火者王怒令典璽太監李國用可碎寶以濟之國用叩頭曰臣萬死不奉詔旣而馬吉翔

李國泰竟鑿以散各臣吉翔弟雄飛專恣尤甚託者必先通雄飛乃得于是行人任國璽纂宋末諸奸行事彙成一帖進之吉翔聞恨之不置王方覽閱次日國泰竊袖之出

十八年辛丑二月二十八日鞏昌王白文選密遣緬人賁疏至云臣不敢速進者欲其扈送出關爲上策耳候卽賜璽書以決進止後五六日文選率兵造浮橋爲迎蹕計相去僅六七十里緬人復斷其橋文選候詔不得遂徹營去

三月有敵盟謀劫東宮斬關以出者兼殺吉翔國泰以弭後患事洩坐以結盟投緬密捕黔國公沐天波家人李姓王啟隆

家人何愛各付本主殺之

五月道臣任國璽有時事三不可解之疏意以禍在燃眉急圖出險王令國璽以出險策條奏馬吉翔李國泰扼之不行

二十三日緬蠻弒其兄而篡其位遣官索賀不從

七月十六日緬人來邀當事大臣渡河議事皆辭不行

十八日緬人又遣官至曰此行無他我王子慮衆立心不善請飲咒水後令諸君皆得自便貿易生計耳否則我國安能久奉芻粟耶

十九日馬吉翔李國泰脇衆入緬止留年老內監一二人侍鄧

凱以足疾得免已而緬人以兵三千圍之呼曰爾大臣可俱出飲咒水有不出者亂鎗攢刺之諸臣猶豫既無寸兵可以相持又慮王與宮闈有失延久無可爲計遂悉出出則以三十人縛一人駢殺之王聞與中宮皆欲自縊內侍之僅存者奏曰王死固當其如國母年高何且旣亡社稷又棄太妃恐貽後世之譏盍姑緩以候天命王遂止已而緬兵入宮搜財帛貴人宮女及諸臣妻女縊于樹者纍纍如瓜果然王與太妃以下二十五人同聚一小屋中驚惶無措已而通事引緬官來護守惟曰不可傷王與沐國公時遍地橫屍緬官請移

沐天波所居之室大小止存三百四十餘人聚于一樓哭聲聞于一二里外寺僧私以粗糲進賴以得飽且知諸臣之飲咒水俱爲所殺而黔國公沐天波及王昇魏豹王盛隆等各擊傷緬兵數人而死亦倍慘

二十一日緬人仍請王還舊居處

二十五日進鋪陳銀布等物且致詞曰我小邦王子實無傷犯諸臣之心因各營兵殺戮邨民民恐實甚乃甘心于諸臣以快其忿也幸無介介于小邦王領之而已王病所存大小男女無不病者死亡相繼諸臣昔之由陸路而去者約離緬半

月程住四五日皆爲緬人所屠其子身無家累者約離緬一月程方住于一小國中緬人以兵洗之而擒其王以歸蓋從王入緬者殘無噍類矣

十二月初二日未時有緬官二三人來謁云此地不便於居處請移他所爾國兵近我城將發兵取道于此恐驚王耳語未畢而緬人昇王所坐杌子卽行太妃大哭隨之繼有二肩輿昇太妃次王妃以行大小男女步行五里外渡河至岸已昏黑不知所由爲何經三鼓後至營始知爲三桂營也

初四日王入大營

初六日王復轉亞哇城

初九日王長發歸滇

康熙元年壬寅三月十三日王入滇城

十八日王被縊

滇粵陽秋云辛丑五月江西道御史任國璽奏爲時事三不可解謂上年本請世子開講期年不行今勢如累卵不思出險尙然如此次日着任國璽獻出險策國璽奏能主入緬者必能主乎出緬今日事勢至此乃卸肩于建言之人乎時王祖望鄧居詔各疏劾翔泰有內官曰爾上千本萬本亦何用

其權若此禮部楊在講書賜之坐典璽李崇貴以爲非禮次日亦賜崇貴坐崇貴辭曰今雖亂世禮不可廢每講崇貴出外一日世子問楊在曰哀公何名在不能對

龔彝順甯府人天啟乙丑進士旣從王至滇具酒肴進謁王所守者不許彝厲聲曰此吾君也我爲其臣君臣之義南北皆然我祇一見耳何拒我爲守者往啟三桂三桂許之彝遂得入堂上設宴請王出朝禮畢進酒王稱謝痛哭不能飲彝伏地痛哭亦不能起再勸王飲王勉飲三爵彝再拜不止遂觸地而死王撫之慟幾仆

襍錄曰吳三桂標將有商于吳者問以舊晚坡之事據云十
二月初三日三桂至舊晚坡檄緬送王緬亦遣人相聞薄暮
緬人送人首十七至三桂營營中訛言王薨及二鼓讒言王
至矣隨眾出迎見二艘渡江來一爲王及太妃王妃世子郡
主一爲遇害諸臣家屬有緬相及蠻兵二百餘人俱至三桂
送王及宮眷于公所王南面坐達旦三桂標下舊官相繼入
見或拜或叩首而退少頃三桂進見初甚倨傲見王長揖王
問爲誰三桂嚙不敢對再問之遂伏地不能起及問之數至
始稱名應王切責良久三桂緘口伏地若死人王卒曰今亦

已矣我本北京人欲還見十二陵而死爾能任之乎對曰某
能任之王令之去三桂伏不能起左右扶之出則色如死灰
汗浹背自後不復敢見

東昌李君調云緬酋送王舊晚坡在庚子十二月辛丑三月
十八日以弓絃絞于金蟬寺調時在三桂營中目擊者此云
壬寅未知何據

此與求野錄皆由榔亡臣所記者其事較明史差爲詳備閱
之則其倉皇貿亂之狀歷歷如畫或謂李定國少勝于孫可
望然恃強矜功賊性終在退狼進虎之說誠不誣也第事機

既去毅然就死以視安寵營之皇帝一員后一口支糧若干者似爲略具人心矣我

純皇帝閱實錄見睿親王與史可法書而可法答書遍覓無存後得之內閣中 特命裘漢補入且書其後曰實錄謂可法報書語多不屈夫可法明臣也其不屈宜也况可法書語初無詬誶不經之言雖強詞以辯亦明臣尊明之義耳大哉

王言實立萬世作史之法因取二錄之在滇者節存一二庶使後之傳聞異詞者無所眩惑焉

三朝野紀

天啓丙寅四月勅諭東廠太監魏忠賢我祖宗建都于燕賴東南漕運以給軍餉若北新倉主事李柱明倖濫甲科潛懷穿窬心如廁中碩鼠形如梁上鵲鴟不思粒粒皆萬民膏脂竟以汶汶潤一家囊橐偷盜之米已盈二千九百石之多入已之贓已有一千八百兩之數賴爾忠賢甘勞怨而如飽發臺諫所未糾去貪剔蠹嚴勒還倉一舉而上關國計下儆官邪茂績如斯褒嘉何靳除賜銀幣羊酒外仍增廕獎勵 此賜勅獎勵之始嗣後連篇累牘封伯爵晉國公賜鐵券有過於九錫文者不勝概錄矣柱明爲惠世揚門人惠逮入都周

旋不避形跡故及於禍李雲南人李公籍阿迷壬戌進士
黨禍之始王公元翰首攫其鋒迨忠賢亂政王公已降黜在
外遂肆毒于李公而楊左周黃卽繼之此勅之在今日褒魏
逆實所以榮李公也滇志失載其子孫亦鮮知之者故備錄
之使有所考焉己巳立春日師範手記

冊府元龜

開元二十六年九月封西南大酋帥蒙歸義爲雲南王制曰
古之封建誓以山河義在酬庸故無虛授西南蠻都大酋帥
特進越國公賜紫袍金鈿帶七事歸義挺秀西南是稱酋傑
仁而有勇孝乃兼忠懷馭衆之長材秉事君之勁節瞻言諸
部或有姦人潛通犬戎敢肆蜂蠆遂能躬擐甲冑總率驍雄
深入長驅左縈右拂凡厥醜類應時誅剪武功若此朝寵宜
加俾膺胙土之榮以勵扞城之士復遣中使李思敬齎冊書
往冊焉

開元二十年三月壬戌西南蠻蒙崇先來朝授郎將賜帛三
十匹放還蕃

貞元十年九月辛卯南詔使蒙湊羅揀及清平官尹求寬來
獻鐸槃浪人劍及吐蕃印八鈕湊羅揀異牟尋之弟也旣朝

召見於麟德殿賚賜甚厚

十一年四月壬戌贈南詔異牟尋弟湊羅揀右常侍初牟尋令湊羅揀入朝還國卒於道故追贈焉癸亥以南詔謝册使尹輔曾為檢校太子詹事兼中丞餘皆授官有差甲子下勅書及贈帛賜南詔異牟尋及子各勸清平官鄭廻尹求寬等各一書書左始引中書三官宜奉行復舊制也

十八年正月戊寅以驃國王子悉利移為試太僕卿

十九年正月癸丑南詔朝賀使楊鑲龍試太僕少卿兼侍御史

元和二年八月丙辰朔授南詔使者鄧傍傳試殿中監

七年正月癸酉帝御麟德殿對南詔渤海狔柯等使賜宴有差丁亥御麟德殿對南詔使李興禮等各授以官

十年十二月辛丑賜南詔蠻使楊廷奇等告身二十九通丙午賜南詔蠻錦綵有差

十一年五月己酉以南詔蠻大首領蒙龍盛卒廢朝三日約東土司檄萬曆十一年

告各土司爾等皆僭爵割符世世為朝廷臣子受我卵翼之恩至厚也莽賊諄鷲憑恃深阻鴟張螳怒以逆我軍吏彼實

遼天背化甘自棄絕於覆載照臨之外爾等苟懷忠義之性者未有不豎目切齒願得而甘心焉顧聞一二愚闇不識逆順利害反教猱升木爲虎附翼潛以吾內地虛實輸之爲彼嚮道此亡異故賊酒爾以貨又怵以威也夫賊誠有封爵祿秩能世世富貴爾哉彼徒以聲勢恐喝實不能爲若害卽或攻剽亦孰與王師天誅如雷轟霆徹無不糜滅者也損爵秩以博貨且畏死而就必死此之爲算可不謂愚且莽賊之狡焉欲蠶食諸土司非一日矣所以猶存無恙者恃朝廷之力能制其命爲若主也被猶豺虎然且噬而疆宇滅而宗廟虜

而子女若屬其奈何惟天子赫然震怒莽賊之不虔追罪往時偷安諸臣而督責於今之任事者我鎮臣奉將天伐誓不與此賊俱生矣頃者老姚關之捷罕虔景宗才就擒賊已褫梟剪滅滌蕩近在朝夕正若屬奮身立功之秋也今與若屬期各要屬部落與我同仇其一二愚昧爲所脇誘者已往不問咸與維新有能慕義効忠僇力赴敵或助兵以隸行間或助餉以奉戰士爲我偵候得其聲息爲我反間攜其黨與爲我挾刃刺之帳中爲我遮截過之閫外爲我犄角擊其侵軼爲我設覆絕其歸路我鎮臣當分別功狀上於天子益封進

秩賜資金帛以酌爾勞有如落奸懷貳怙惡不悛輸欵莽酋
比周觀望陰爲向導窺伺者我鎮臣奉簡書得便宜行事且
移兵先誅之然後奏報天子滅爾封土殲爾族類俾無遺育
必不爾赦

傳諭滇黔檄

順治十年

帝王君臨天下凡聲教所暨莫不來享來王非徒貪土地之
廣人民之富誠體上天眷顧之意不欲使僻隅遐陬一物失
所也在昔周初越裳氏慕聖人之德重九譯貢白雉漢唐以
來隸在版圖與中原編氓無異是則素號嚮化非跳梁爲患

者比矣邇者明政不綱文武泄泄賦繁刑酷以致盜起燎原
國以淪亡李自成牧豎小人攻陷燕都豺狼之輩影附若雲
帶甲烏合幾於百萬宮闕災於回祿縉紳斃於敲朴原野膏
肉川谷飲血元元塗炭不意復見太平天授我 大清皇帝
應運龍飛關門一戰摧枯拉朽士女謳歌卜宅定鼎收羣龍
髯網羅逸臣則是我有大造於明也然後天戈西指全秦委
命鯨鯢授首短狐草面嗣以江南荒淫民不聊生義旗東下
飛渡天塹福唐二藩銜璧恐後雖王濬之入石頭高頰之擒
叔寶衡其功蹟不啻徑庭茲肅王兵至蜀川勢如破竹獻寇

伏誅神人共快遂使蠶叢魚池之區復有披雲見天之日爾
黔中滇池兩省密邇鄰壤聽諸最真既懷後后之思豈無雲
霓之望但恐奸人煽惑愚衆効任囂教尉佗之計將欲雄長
一方南面稱孤殊不知彈丸黑子不過神州一郡我國家士
如熊虎粟若邱山若扼普定之吭浮牂牁之江如舉崑崙以
壓細卵決滄海而灌熒蒿耳且識時務者在乎俊傑天之所
廢不可與天之所與亦不可逆也故竇融舉河西以歸漢李
世勣籍郡縣以附唐並膺封侯之賞隆丹券之寄載在簡冊
世所艷稱我 皇上柔綏遠人誠若金石能以土地軍民來
歸者一體錄用若執迷不悟或稱兵拒順逆我顏行玉石俱
焚噬臍何及故茲特檄往諭慎之毋忽



